

**Anwar terus berdolak-dalik
Utusan Online
15 Mac, 2012**

KUALA LUMPUR 14 Mac - Datuk Seri Anwar Ibrahim semasa sidang Dewan Rakyat semalam terus berdolak-dalik berhubung kenyataannya menyokong segala usaha bagi melindungi keselamatan negara Israel yang dibuat menerusi satu wawancara dengan *The Wall Street Journal* (WSJ) pada 26 Januari lalu.

Berikut adalah kenyataan asal Ketua Pembangkang itu seperti yang disiarkan dalam wawancara WSJ itu:

"I support all efforts to protect the security of the state of Israel," although he stopped short of saying he would open diplomatic ties with the Jewish state, a step which he said remains contingent on Israel respecting the aspirations of Palestinians.

Terjemahan: "Saya menyokong segala usaha bagi melindungi keselamatan negara Israel."

Namun beliau tidak mengesahkan akan membuka hubungan diplomatik dengan negara Yahudi (Israel), satu langkah yang menurutnya tertakluk sama ada Israel akan menghormati aspirasi rakyat Palestin.

Sikap dolak-dalik Anwar itu terserlah apabila Ahli Parlimen Rembau, Khairy Jamaluddin ketika persidangan mendedahkan bahawa sokongan Ketua Pembangkang itu terhadap usaha melindungi keselamatan Israel adalah bersifat mutlak dan bukannya bersyarat.

Menurut Khairy, apa yang dinyatakan Anwar itu amat jelas kerana maksud contingent (syarat) oleh WSJ bukan merujuk kepada sokongannya melindungi keselamatan Israel sebaliknya merujuk kepada pertanyaan sama ada Anwar mahu mengiktiraf negara Israel atau tidak.

Walaupun mendapat desakan pelbagai pihak yang mahu Anwar menarik balik kenyataannya itu selain meminta beliau menjelaskan mengenai apa yang diperkatakannya, Ahli Parlimen Permatang Pauh itu tetap berdegil untuk tidak berbuat demikian sambil memberi pelbagai alasan mengenainya.

Malah, Anwar tidak mahu menyaman WSJ berhubung penyiaran artikel itu serta enggan memohon maaf kepada umat Islam yang rata-rata terguris hati dengan kenyataan itu.

Anwar juga cuba mempertahankan tindakannya itu dengan pelbagai alasan termasuk mendakwa kerajaan Malaysia tidak konsisten dalam pendirian dan dasarnya berhubung Israel dan bahawa bekas Perdana Menteri, Tun Dr. Mahathir Mohamad turut menyokong Israel.

Ekoran itu, kerajaan Malaysia bertindak menyiarkan tiga pucuk surat oleh Dr. Mahathir kepada tiga bekas Perdana Menteri Israel yang menyangkal segala tohmahan Anwar dan pakatan pembangkang terhadap kerajaan.

Bukan itu sahaja, tindakan Anwar menjaja nama pertubuhan Hamas di Palestin dengan mendakwa bahawa pendirian pertubuhan itu selari dengan beliau memakan diri sendiri apabila Hamas tampil menafikan dakwaan Anwar itu.

Source:

http://www.utusan.com.my/utusan/info.asp?y=2012&dt=0315&pub=Utusan_Malaysia&sec=Politik&pg=po_01.htm